

14 MAY 2002

Amerika-Hubungan/I

KUMPULAN AMERIKA SAMBUT BAIK HUBUNGAN AS-MALAYSIA DITINGKATKAN

Oleh: E.Sivabalan

WASHINGTON, 14 Mei (Bernama) -- Kumpulan-kumpulan berpangkalan di Amerika yakin bahawa lawatan Perdana Menteri Datuk Seri Dr Mahathir Mohamad ke Washington sekarang, yang memperkukuhkan lagi perhubungan dua hala antara Malaysia dan Amerika Syarikat, akan merangsang aktiviti ekonomi yang meningkat antara kedua-dua negara.

Di samping mewujudkan persekitaran yang sesuai bagi para peniaga dari kedua-dua negara menjalankan perniagaan, mereka berkata ia akan membuka jalan bagi lebih banyak lawatan di kalangan pemimpin atasan dan pegawai kerajaan.

Presiden The Heritage Foundation, Dr Edwin J. Feulner, berkata perhubungan yang dipertingkatkan itu pastinya akan memperkukuhkan kerjasama ekonomi antara Malaysia dan AS, yang merupakan pasaran utama bagi Malaysia.

Malaysia adalah rakan dagangan ke-11 terbesar dan pasaran eksport ke-17 terbesar AS. Jumlah dagangan antara kedua-dua negara berjumlah sebanyak AS\$29.6 bilion (RM112.48 bilion) tahun lepas.

Barangan eksport Malaysia ke AS dianggarkan sebanyak AS\$17.9 bilion (RM68.02 bilion) manakala barangan import AS ke Malaysia adalah sebanyak AS\$11.8 bilion (RM44.84 bilion) tahun lalu.

Pelaburan Amerika di Malaysia antara 1996 dan 2000 bernilai AS\$6 bilion (RM22.8 bilion) tetapi ia telah menurun kepada AS\$2.9 bilion (RM11.02 bilion) pada 2000-2001.

The Heritage Foundation, diasaskan pada 1973, adalah sebuah kumpulan pemikir penyelidikan dan pendidikan yang matlamatnya menggalakkan dasar-dasar awam yang konservatif berasaskan kepada perdagangan bebas.

Sambil menyifatkan Dr Mahathir sebagai "seorang yang berterus terang dan kontroversial," Feulner berkata perdana menteri itu mempunyai pandangan yang lantang yang disuarakan pada majlis makan malam Isnin lepas yang dianjurkan oleh Persatuan Pertukaran Amerika Syarikat-Malaysia (USMEA).

"Ia adalah cara yang amat baik bagi beliau untuk memulakan urusan," katanya, merujuk kepada sikap keterbukaan dan berterus terang Dr Mahathir dalam mahu memulakan semula hubungan dua hala dengan AS daripada segi hubungan dua hala dan kerjasama ekonomi.

Pengerusi Frontiers of Freedom, Senator (bersara) Malcolm Wallop beretuju bahawa iklim perniagaan antara kedua-dua negara akan diperkukuhkan lagi.

Beliau memuji Dr Mahathir kerana mentakrifkan peperangan AS ke atas keganasan -- yang bukan perang terhadap Islam atau umat Islam tetapi terhadap penganas.

"Ini (takrifan Dr Mahathir) telah memberi kesan yang besar di AS," katanya.

Frontiers of Freedom adalah pertubuhan bukan mencari keuntungan yang menumpukan kepada melindungi hak perlembagaan semua rakyat Amerika dan memulihkan had perlembagaan ke atas tahap dan kuasa kerajaan.

Pengarah USMEA Ken Sheffer berkata Washington mahu meluaskan lagi perhubungan dengan Kuala Lumpur.

"Perdana menteri telah melakukan kepulauan yang positif ke Washington," katanya, merujuk kepada lawatan terakhir Dr Mahathir ke AS pada 1994 apabila beliau menemui Bill Clinton, Presiden AS ketika itu.

Feulner, yang mengadakan persidangan akhbar bersama dengan Wallop dan Sheffer untuk media Malaysia malam Isnin, mengakui bahawa perhubungan AS-Malaysia adalah "bermasalah" semasa Clinton menjadi presiden.

Dr Mahathir tiba di sini Isnin untuk lawatan tiga hari dan akan mengadakan perbincangan dengan Presiden George W. Bush dan pegawai-pegawai atasan pentadbiran Bush di White House Selasa.

Pengerusi USMEA Tan Sri Megat Junid Megat Ayub, yang turut hadir pada sidang akhbar itu bersama-sama dengan naib pengerusi beliau Datuk Jamaluddin Jarjis, berkata bahawa hakikat yang Dr Mahathir menginap di Blair House, rumah tetamu rasmi presiden AS itu, dengan jelas menunjukkan bahawa Bush mempunyai penghormatan yang tinggi terhadap perdana menteri itu.

Katanya Blair House, terletak setentang dengan White House, disediakan bagi ketua-ketua negara sahabat.

Megat Junid turut menyatakan bahawa terdapat kumpulan-kumpulan di AS yang mahu "mengkhianati" pertemuan Mahathir-Bush itu.

"Terdapat segelintir kumpulan (tetapi) saya tidak begitu bimbang mengenai mereka," katanya.

Bagaimanapun, beliau enggan mendedahkan identiti kumpulan-kumpulan atau orang di sebalik mereka apabila ditanya oleh para wartawan.

Bagi USMEA, kata Megat Junid dan Sheffer, misinya adalah meminta orang Amerika melihat Malaysia kerana apa ia sebenarnya -- sebuah negara yang berkongsi nilai-nilai dan pengalaman yang serupa dengan AS.

"Matlamat kita adalah untuk membawa perhubungan AS-Malaysia ke tahap biasa", katanya. USMEA dirasmikan di Kuala Lumpur awal tahun ini.

-- BERNAMA

ES MR SHY OS NMO